

辛 亥 革 命 史

東 方 文 庫 第 一 種

文庫目錄

- [1] 辛亥革命史
[2] 帝制運動始末記
[3] 壬戌政變記
[4] 歐戰發生史
[5] 大戰雜誌
[6] 戰後新興國研究
[7] 華盛頓會議
[8] 俄國大革命記略
[9] 勞農俄國之考察
[10] 蒙古調查記
[11] 西藏調查記
[12] 世界之秘密結社
[13] 世界風俗談
[14] 日本民族性研究
[15] 中國改造問題
[16] 代議政治
[17] 歐洲新憲法述評
[18] 領事裁判權
[19] 新城市
[20] 貨幣制度
[21] 社會政策
[22] 合作制度
[23] 農荒豫防策
[24] 近代社會主義
[25] 馬克思主義與唯物史觀
[26] 社會主義神髓
[27] 婦女運動(二冊)
[28] 婦女職業與母性論
[29] 家庭與婚姻
[30] 新聞事業
[31] 東西文化批評(三冊)
[32] 中國社會文化
[33] 哲學問題
[34] 現代哲學一瞥
[35] 西洋倫理主義述評
[36] 心理學論叢
[37] 名學稽古
[38] 近代哲學家
[39] 柏格遜與歐根

- 〔40〕克魯泡特金
- 〔41〕甘地主義
- 〔42〕戰爭哲學
- 〔43〕處世哲學
- 〔44〕羅素論文集(二冊)
- 〔45〕究元決疑論
- 〔46〕科學基礎
- 〔47〕宇宙與物質
- 〔48〕相對性原理
- 〔49〕新曆法
- 〔50〕進化論與善種學
- 〔51〕迷信與科學
- 〔52〕笑與夢
- 〔53〕催眠術與心靈現象
- 〔54〕食物與衛生
- 〔55〕石炭
- 〔56〕鑄錠
- 〔57〕飛行學要義
- 〔58〕科學雜俎(四冊)
- 〔59〕近代文學概觀(二冊)
- 〔60〕文學批評與批評家
- 〔61〕寫實主義與浪漫主義
- 〔62〕近代文學與社會改造
- 〔63〕近代戲劇家論
- 〔64〕近代俄國文學家論
- 〔65〕但底與哥德
- 〔66〕莫泊三傳
- 〔67〕美與人生
- 〔68〕藝術談概
- 〔69〕近代西洋繪畫(二冊)
- 〔70〕國際語運動
- 〔71〕考古學零簡
- 〔72〕開封一賜樂業教考
- 〔73〕元也里可溫考
- 〔74〕東方創作集(三冊)
- 〔75〕近代英美小說集
- 〔76〕近代法國小說集(二冊)
- 〔77〕近代俄國小說集(五冊)
- 〔78〕歐洲大陸小說集(二冊)
- 日本小說集
- 〔80〕太戈爾短篇小說集
- 〔81〕枯葉雜記

史 命 筆 亥 辛

編 勞 高

週 東
年 方
紀 雜
念 誌
刊 二
物 十

目次

第一章 革命戰爭時代……………一

一、革命主義之傳播 二、武昌發難 三、各省響應 四、清政府之對

付

第二章 革命成功時代……………二三

一、各省之狀況 二、海軍之歸附 三、南京及武漢之戰事 四、和議
之進行 五、邊境之被動

第三章 臨時政府成立時代……………三六

一、臨時政府之組織 二、南京政府之成立 三、清帝退位及南北統
一 四、統一政府之成立

附錄……………五九

中華民國臨時約法 中華民國國會組織法 大總統選舉法

辛亥革命史

高勞編

第一章 革命戰爭時代

一 革命主義之傳播

革命之事，各國有之。此事之起因，率由政治之不良，政體之未善，而種族之異，亦足爲其誘因。遠者不具論。自一九〇八年以後，土耳其之青年黨，迫土帝去位；波斯之南方民族，驅波帝離國；葡萄牙以海陸軍人之不平，促成政變；墨西哥以梅特洛之野心，率叛軍而驅逐其大總統狄愛士，革命風潮，迭起環生。當其君民寇讎，操戈同室，禦外利器，移以對內，肉飛血濺，肝腦塗地，此誠歷史中之慘劇也。我國革命之

現象，至一九一一年而大著；而考其主義之發生，則夫提倡之，傳播之，實行之，伏而不滅，蹶而愈奮者，已非一朝一夕之故。洪楊之役，無論已。光緒丙申，孫文創立興中會於廣東，糾合同志，欲起革命軍，事洩，遁至英格蘭；是時龔照璜爲英使，使人以計誘至使館而擒之，英人大譁，以爲侵犯其國權，得釋出。孫於是往來歐美及南洋日本，鼓吹其主義；未幾而有史堅如謀殺總督德壽被戮之事；又未幾而有漢口唐才常之變，安徽大通之變，廣西鎮南關之變，雲南河口之變；且謀炸端方於天津者有吳樾，槍斃恩銘於安慶者有徐錫麟。其他言論事實之相繼發現者，旣日演而日激，革命之聲浪，震盪於國民之耳鼓，革命之思想，遂深印於國民之腦筋。當時下有鼓吹革命之黨人，而上復有製造革命之官吏，立憲其名，專制其實，商路則收爲國有，外債則任意大借，代表則遞解回籍，內閣則專任親貴，凡可以離民之心，解民之體者，行之惟恐不力。又值各省水災，饑民徧地，天時人事，相逼而來，宜乎廣州之變，方起於前，川省之事，又繼於後，一波甫平，一波又起；迨武漢事發，各省響應，革命軍之

旗幟，遂翹然高舉於禹域之內矣！

二 武昌發難

革命黨人散居南洋各埠；其舉事也，以沿海邊省爲利。自一九一一年三月二十九日，在廣州舉事不成，於是變計從長江流域入手。清廷亦知蘇皖鄂等省，均有黨人潛伏，並有大宗軍火，由牛莊運入長江，密令鄂督瑞澂加意防範。自四月初旬以後，鄂省之防範革命黨者，至爲周密：陸軍第八鎮統制張彪，分布軍隊，按段梭巡；巡警道黃祖徽，亦飭武漢各區區長及區官巡官，晝夜更番，與軍隊聯絡一氣，空屋廟宇旅館之中，尤爲注意。以龍神宮年久廢棄之槍械，亦查獲呈報，識者雖嗤其張皇，而監察之嚴，亦可想見。至對於陸軍兵士，深防誘言煽惑，更有種種戒嚴之命令；除派憲兵偵探外，又飭各營各設告密箱一具，每夜掌號息燈之後，即不許彼此往來；外來賓客有作密談者，准各該隊什伍長監聽；防範之嚴，爲歷來所未有。八月初九

日瑞激接到外務部密電謂革黨黃興聯絡黨人約期十五十六兩日聚鄂起事。并有三十標切兵同時策應之約；於是軍警各界益嚴密查防，商店居民大爲惶恐。及期無恙，咸謂事機洩漏，不足爲患。詎至十八日之夜，革黨之形迹竟發見多處：荆襄巡防隊統領陳得龍，在漢口英租界拿獲革黨劉汝夔邱和商二人，洋務公所吳愷元，在俄租界寶善里內拿獲革黨秦禮明龔霞初二人，并起獲炸彈手槍旗幟印信鈔票滙票甚多；張彪在小朝街九十二號拿獲革黨八人，在八十二號八十五號拿獲二十七人，內有女黨員龍韻蘭及陸軍憲兵隊什長彭楚藩，同時又在雄楚樓北橋洋房內拿獲印刷告示繕寫冊籍之革黨五人，而黃土陂千家街地方有黨員楊宏勝亦因自試炸彈轟壞而被獲；督署之內又發見炸藥一箱，有教練隊軍士二人，形跡可疑，訊明希圖炸署不諱，即在署前正法。翌晨復將捕獲之黨人審決多名。是時鄂督瑞激以爲其謀已破，可無大患，自以定亂俄頃欣欣有得色；且疑新軍皆爲革命黨，欲嚴行查緝，如有形跡可疑之兵士，即以軍法從事。嘗笑問張彪曰：『爾

軍隊中有多少革命黨？張彪曰：『大約有十之三。』瑞澂曰：『然則以十之七拿十之三，事便可了。』一時新軍聞之，人人自危矣。

武昌向稱有新軍萬六千人，合組爲步隊馬隊礮隊三種，悉歸張彪統轄，軍隊平時，咸懷怨望，其情形本極危險。自端方入川抽調外，所餘各營，殆皆全體聯合，反對長官，經革黨暗中運動，久已躍躍欲試，而瑞澂復以嫌疑恣意搜捕，各營遂變。十九日下午九時，工程第八營左隊營中，忽有炸彈聲喧噪聲，同時猝起，以同心協力爲暗號，擊下肩章，左右各繫白巾，督隊官阮榮發等出阻，卽被槍斃；步隊二十九三兩標，殺斃管帶二人，排長二人，隊官一人，旗兵在楚望臺被殺者三十餘人，各兵中亦有被擊斃者。九時半，趨火藥庫，劫取子彈。十五協兵士，已同時齊集大操場，與工兵聯合，悉運子藥至蛇山下關馬廠諮議局旁，卽大呼趨督署，與防護馬隊互擊五十分鐘，馬隊不支，亦與工兵聯合，卽分兵三處：一駐鳳凰山，一駐蛇山，一駐楚望臺，各架礮轟擊督署，致山前民房，多被震毀。二十日，總督瑞澂，藩司連甲，統制張彪，均

棄城逃。革軍既起，尙未得一首領，衆議以第二十一混成協統黎元洪當之。黎元洪者，曾留學外國，從事於中東之役，知識既富，經驗尤宏，屈居張彪之下而無怨言，素爲軍心所歸附者也。衆遂趨黎寓所，迫令出爲代表，否則將槍斃之。黎允諾，遂改諮議局爲軍政府，黎元洪爲鄂軍都督，前諮議局議長湯化龍爲民政總長。初發難時，革命軍頗有殺戮滿人者，黎都督既就任，傳令不得在城內放礮，不得妄殺滿人。一面派兵守藩庫，官錢局，儲蓄銀行，度支公所，財政處。於是武昌省城全爲革命軍所佔領。既佔武昌，卽遣軍渡江，先至兵工廠，聲稱張彪派來保護之兵，廠中信之，革命軍分守各地，仍令照常工作，以供軍用。總辦王壽昌遁匿上海。與兵工廠毘連者有鐵廠，亦爲革命軍所佔，以其爲商辦也，不加改革，拘留其總辦李維格，照舊辦事。其他漢陽官吏，逃匿無蹤，於是漢陽府城又爲革命軍所佔領。二十一日，有土匪在漢口華界乘機縱火，意圖擄劫，軍政府立遣數百人馳至，一面救火，一面擒匪，并盡力保護外人之生命財產。夏口廳王國鐸子身遠颺，遂推前大江報主筆詹大悲爲漢

口軍政分府，於是漢口又爲革命軍所佔領。當革命軍之初起也，外人疑其含有排外之性質，以爲庚子拳匪之禍，將復見於武昌，及見革命軍舉動文明，極爲贊歎。二十日，軍政府照會各國領事團，以保護租界自任，要求其嚴守中立，並聲明從前清政府所借外債及賠款，俱照約履行，以後如有借款，則不能承認。領事團會商，擬宣告中立，於兩方面戰事，毫不干涉，電詢各政府，均得贊成；則是各國已承認革命軍立爲獨團體也。

三 各省響應

武漢居本部之中樞，扼長江之上游，革命軍得此，有高屋建瓴之勢；而各地黨人，又皆以事有可爲，宜乘此時機，互相響應；故武漢起事，未及旬日，如本省之黃州府，武昌縣，沔陽州，宜昌府，襄陽府，及沙市，新隄等處，卽次第爲革命軍所佔領。各省之響應者，就其最先者言之，若湖南，陝西，江西，山西，雲南，安徽，江蘇，浙江，廣西，福建，廣東，

奉天或獨立，或舉兵。此外各省，雖因電信不通，當時未即知其現狀，然隸屬於清政府之下者，已無幾矣！

長沙有新軍六百人，巡撫余誠格慮其爲亂，先令駐紮城外，繼令移駐醴陵。九月初一日，該兵攜礮入城，防軍將閉城相拒，新軍一擁而入，遂進圍撫署。余誠格由後門逃去，防營統領黃忠浩帶兵往擊，新軍所部兵士不肯放槍，黃怒曰：『不發槍，則以軍法從事。』兵士曰：『諾。』即以槍擊斃黃忠浩。提學兼藩司黃以霖，提法司劉鍾琳，關道汪瑞闈均逃匿；巡道戚朝卿勸業道王曾綬因抵抗被殺；首縣陳瀛降而復逃，亦被殺。當時即舉副統領焦達峯爲都督，陳作新爲副都督，譚延闈爲民政總長，爲諮議局爲軍政府，分十五部治事。未幾，又佔領岳州府及衡州府。

陝省新軍，本多陝甘之人，及恩壽撫陝，奏調王毓江充協統；王皖人也，陝省新軍中自是遂多南人，前歲隨熊成基自皖逃出之軍士，幾全數援挈而至。此等軍士，平素主張革命，日肆鼓吹，於是全軍咸躍躍欲動，鄂事一起，聞風響應。九月初一日，有

砲隊三營，工程隊二營，馬步隊二營，相率起事。先佔省城，焚電報局，自巡撫錢能訓以下，官吏逃避一空。初三日佔領渭南、臨潼各城。至初十日，潼關亦被佔領。

江西九江府，自武昌起事後，風聲日迫，至九月初二夜，果有響應之舉。五十五標一二營管帶，與砲臺守將徐世法聯合舉事，先由教練官黃子卿商於標統馬毓寶，馬亦贊成。是夜十時，金雞坡砲臺營先放號砲，城內新軍舉火為應，先奔道署，開槍轟擊，潯道保恆逃。繼分隊攻各署，九江府璞良等亦逃；即舉馬毓寶為駐潯統領，徐世法為駐潯砲臺統領，李雲峯為駐潯副統領。九江府屬之湖口縣，為九江門戶，又為江西內河之要鍵，湖口總鎮楊福田調集砲艇，將與革軍戰，馬毓寶派兵擊敗之；於是湖口砲臺及彭澤縣之馬當砲臺，同日皆為革命軍所佔領。未幾，省城南昌府紳學商各界在諮議局開會，議宣布獨立，辦保安團，首先出力者，為測量司，測繪學堂，陸軍學堂管教各員，各督率學生，荷槍梭巡，擔任義務；各界復舉代表，問巡撫馮汝駁，是否贊成，馮意兩可，衆謂此事不宜觀望自誤，致為民禍，遂聯合軍界，相約起

事初十夜，焚燒萬壽宮，八旗會館，撫署，行政官多潛匿不敢出，勒令馮撫交印，馮撫堅稱已送北京，無印可交。十二日，各界公舉吳介璋爲都督，劉鳳起爲民事部長，方先亮爲司令部長，設軍政府於高等學堂，守護藩署存款，外屬府廳州縣，仍令照舊治事。

山西新軍兩營，久蓄變志，因無子彈，故未動作。適陝西警報至，巡撫陸鍾琦擬派新軍往陝邊防堵，於初七晚發給子彈糧餉，定於次日拔隊啓行；初八日早軍隊全變，槍聲四起，蜂擁入城，直至撫署，縱火焚燒，一面登城開槍，向城內轟擊，城內雖有滿營兵丁，向無子彈，事起倉猝，咸束手待斃，滿城居民，紛紛逃避，巡警道亦不能彈壓；該軍又分出一支，乘正太火車，由壽陽直奔井陘口，正定鎮派馬步隊往拒，始退守娘子關，陸鍾琦被殺，乃推戴藩司王慶平爲都督。

雲南總督李經羲知軍隊之將變也，持先發制人之計，命可疑之軍隊，於某日黎明時早操，忽發令將槍械收回，軍人大震。九月初十晨，標統蔡鐸，率所領往奪槍械

廠；繼攻督署，酣戰終日，至翌晨蔡軍始勝，李經義向南門逃去。蔡軍又乘勝佔領蒙，蔡遂被衆擁戴爲都督，旋即照會英法等國領事，力任保護外人，并撫慰回苗生番等。

安徽自武昌事起，新舊軍概發子彈，至九月初，有新軍變亂之謠，復將子彈收回。初九日，新軍紛攜被鋪至城中各典，每件索當三元，各典窮於應付，將閉門，巡撫朱家寶撥款助之，幸得無事。初十夜，六十二標步兵暨馬礮營並起攻城。朱家寶立飭由南京調來之江防營守紮各城，新軍以無內應，各散去。朱家寶遂飭各營長官，按人發給銀六元，令繳軍裝，全體遣散。紳界中以新軍起義，事雖未成，難免不作後圖。人心惶惶，尤屬可慮，羣議獨立之策，請朱家寶擔任臨時都督，朱家寶許之。遂於十八日宣告獨立。旋有人舉測繪監督 王天培爲副監督，朱家寶以事權不一，不願擔任，王天培遂自爲都督，然資望既淺，商民不願擁戴，於是二十日全城閉市，要求朱家寶仍任都督之事。

江蘇之上海，爲通商大埠，且有製造局，固革命軍必爭之地也。九月十三日，鬧北巡警局左近火起，各巡士皆臂纏白布，與革軍合，俄而城上高懸白旗，夜間道署被焚，進攻製造局，以該局有備，至翌晨始得手；於是公舉陳其美爲滬軍都督，李平書爲民政總長。是夜卽有革命軍五十餘人，由滬赴蘇，先至新軍標營，宣告一切。蘇州紳商，早經舉代表謁巡撫程德全，請其宣布獨立；十五日黎明，新軍各隊，先後進城，一面駐守關要，一面請見程撫，推爲都督，程德全允之；藩司左孝同，巡警道吳肇邦，織造文蔭均避去，是時已滿城懸白旗矣。十六日，松江府鎮江府均宣告獨立，京口駐防旗營，亦順革命軍。十九日，揚州亦爲革命軍所佔領。

浙江省城，早思獨立，內部部署已定，惟未發表。九月十三夜，諮議局沈副議長謁巡撫增韞，請拆卸滿城營牆，編入漢籍，宣告獨立，以免慘見殺伐，增韞不允；次日十四下午，召集官商會議，至晚八時，仍未允洽；是夜二時，有滬來敢死隊，聯合浙軍八十一、二兩標新軍，直攻撫署，連擲炸彈，撫署遂焚；衛隊巡警消防等，見事已起，均袖

綴白布，革軍遂取用衛隊軍火，順道佔領軍裝局，防營亦降，增韞被獲，拘禁於福建會館，織造聯榮亦被拘禁，臨時都督童訓出示安民，並派支隊分據大清銀行及藩運各庫。十五日，改諮議局爲軍政府，舉湯壽潛爲都督。旗營四周被圍，革軍命增撫致函將軍德濟，勸旂營投降。旂營不允，反槍擊投函者，於是革軍亦開砲攻擊。午後，由杭辛齋邀穆詩樵入營，貴翰香出營，至諮議局會議，訂簡約兩條：一、旂兵編入民籍，限本日七時繳出槍械子彈；二、旂兵雖改編民籍，仍照舊發給兵餉，俟時局稍定，爲徐圖生活之計。貴翰香入營宣布，至七點後，營兵繳槍械，革軍亦停止圍攻，大局已定。而外屬各府，如紹興、寧波、湖州、嘉興等，既同時改懸白旗，餘亦次第傳檄而定。

廣西省於九月十六日，諮議局議決獨立，由議長面謁巡撫沈秉堃，請爲宣布，沈未遽允。是時省垣新舊各軍，已歸藩司 王芝祥統帶，是夜，由藩署發出獨立旂許多，乘人靜時，徧擲於各家。十七日，各家各局所均將此旂高懸，其文曰：『大漢廣西全省國民軍恭請沈都督宣布廣西獨立，廣西國民萬歲！』沈秉堃至此時，亦無可如

何，而於是廣西亦獨立矣。

廣東省城各團體，於九月初四日在文瀾書院會議，已主張獨立，總督張鳴岐亦經認可；然是日主動者為清鄉總辦江孔殷，香港共和黨人不信任之，故初八日復有愛育善堂之集議。是日即有人持白旗，大書廣東民團獨立字樣，各舖戶亦懸旂張燈，燃放鞭炮相慶賀，張鳴岐聞之，急派人扯去旂燈，出示禁止，粵垣人心，異常憤恨。至十八日，復在諮議局集議獨立，舉定張鳴岐為都督，龍濟光副之，議以次日正式公布；不料張鳴岐即於是夜避往香港，各行政官亦先後逃去。十九日，各團體復在諮議局會議，舉定胡漢民為都督，蔣尊簋為軍政部長，陳景華為民政部長，胡未到省，以蔣為臨時都督。

福州未發難之時，革命黨草長文一篇，勸滿人釋械，同為共和國民，滿人不應；既而諮議局副議長劉崇佑自滬歸，閩督松壽與商和平辦法，劉擬三條件：一、繳出槍械；二、仍給口糧；三、編入民籍。松督又不肯照辦。十九日，革命軍起，常備軍及青年會

義勇隊等，聯合攻擊。旗兵滿洲街及將軍衙門皆被焚毀，火藥庫亦已佔據。松督仰藥出署，死於某畫師之家。將軍祺壽，都統勝恩，同被拘禁；常備軍統制孫道仁被舉爲都督，高登鯉爲民政部長，劉崇佑爲副部長。

山東各界紳士，以各省風鶴頻驚，又聞清政府向德國借款三百萬，以山東全省土地作抵，遂於九月十五日在諮議局開會，以八事要求政府，請巡撫孫寶琦代奏，如三日不答覆，卽宣告獨立；但其所求之八事，實亦與獨立無異。十九日，既得內閣覆電；二十日，卽改組保安會，舉夏紀元于普源爲正副會長，二十一日，又決議實行聯邦政策，卽舉孫寶琦爲臨時都督，改諮議局曰聯合會，於是宣告獨立。

奉天旗漢雜處，逼近強鄰，情形與南省不同。自九月十八晚接京師警電，人心惶懼異常，市面震動。忽有剪髮者四人來諮議局，要求吳議長豎立白旗，吳以事關重大，婉言拒絕；民政司張元奇擬仿照各省辦法，布告獨立；然此策實非奉天所宜，在座各司道及自治各團體，均不贊成。是時旂漢居民，深恐互起猜嫌，激成意外。二十

日晨，由學界發起，聯合各界，無分種族，倡辦聯合保安會，以保公安，東督趙爾巽，被舉爲會長；蓋奉天以對外之關係，不能用獨立之名義也。

此外未告獨立之省固已無多，且兵變時聞，亦有待時而動之勢，如灤州軍隊，有改換軍旂之風說；保定軍隊有據守軍械局之傳聞，而河南諮議局亦以獨立之辦法，派人與袁世凱協商矣。獨立者，脫離政府之謂也；脫離政府者，贊成革命之謂也。武昌發難，而贊成者幾徧全國，革命主義之流行，可謂速於置郵矣！

四 清政府之對付

八月二十日午後一時，武昌警報達北京，是日，內閣總協理聚謀於慶邸，徹夜未歸。瑞澂電奏，有『速派北兵來鄂，願粉身恢復』等語，二十一日有旨，瑞澂着卽革職，仍暫署鄂督，責成迅將省城克復。一面內閣開特別會議，以革命軍之志非尋常可比，議決派兵前往。隨卽有旨，令陸軍大臣蔭昌，統帶近畿兵兩鎮，速卽赴鄂勦辦，又

令薩鎮冰率海軍，程允和率長江水師，卽日赴援。二十二日，廕昌請訓，坐專車出發，指定第六鎮全鎮，第一第四鎮各派一混成協，自是日起，分五日陸續進發。第六鎮原駐保定，於本日進發，抵豫後，暫令留守黃河鐵橋，以阻革軍北上；第一鎮原駐北京，第四鎮原駐永平馬廠，先後起行。是日豫撫寶棻令豫軍兩營駐紮澠口，會同北軍前進。二十三日，廕昌之前哨軍隊，馳抵距漢口二十餘里之劉家廟，駐紮。是日有旨，湖廣總督着袁世凱補授，並督辦剿撫事宜。廕昌薩鎮冰所帶水陸各軍，着袁世凱會同調遣。二十四日，統帶官馬繼增率第二十二標抵漢口，駐紮江岸。二十六日，廕昌行抵信陽州，軍隊陸續到漢，海軍提督薩鎮冰乘楚有兵船亦至，所統建安，建威，江元，楚豫，楚泰，楚謙各礮船，湖隼，湖鷹，湖鷄，及辰，宿各雷艇，咸開駛漢口江心下碇。當北軍之南下也，有獻計於黎元洪者，請拆毀京漢鐵路以阻其來，黎意以爲北軍來，必與革軍聯合，不允毀路，亦不先遣軍隊迎截，故北軍得以直抵漢口，而漢口遂爲戰場矣。是日下午，張彪殘兵約兩營，在劉家廟一帶，與革軍開始小戰。二十七

日，北來豫軍及張彪陳得龍之殘兵共約一鎮，革軍亦約一鎮，天明開戰，革軍頗奮勇，北軍避入火車，飛駛而退，革軍追之，北軍就車中還擊，革軍頗受夷傷。時觀者甚衆，有劉仁祥及鐵廠工人多名，譁而起曰：『拆路拆路！』轉瞬路已拆斷十餘丈，車去已遠，有頃忽又飛駛而來，至路斷處，車即翻倒，革軍伏兵起，趁勢力擊，北軍死者以千計。午後四時又開戰，北軍添以礮隊，薩軍兵艦又開礮相應，革軍還礮中艦上，兵艦即駛退下游，陸上兩軍互擊，至二時，北軍又敗，退三十餘里。二十八日，革軍黎元洪親自督戰，派敢死隊一千五百人，於早晨渡江，逕至劉家廟，至十一時，聯合兵隊槍礮齊開，北軍隨戰隨退，至某鐵橋，有卸甲者，有退跑者，槍械彈藥，均爲革軍所獲。是日江心所泊之兵艦，始亦開礮助戰，未幾，即駛退下游。二十九日，艦隊復上駛，北軍與革軍在七里河開戰，兵艦向前助戰，施放數礮之後，因受武昌漢口兩面之礮擊，即下駛；兵艦既退，陸軍勢孤，亦爲革軍所敗。三十日，兩軍復在三道橋一帶交戰，革軍敢死隊伏一隄下，彈擊北軍，每發皆中，北軍陣山上，礮彈向下轟擊，多落隄後。

水中，北軍敗，退至瀟口以北。九月初三日，兩軍在朱家河開戰，互有損傷，不分勝負。初四日，交戰於七里河，亦互有損傷。初五日，北軍進攻江岸車站，前哨已抵一道橋，爲革軍所擊退。初六晨，瀟口駐屯之北軍，向前進發，抵二道橋，與革軍相遇，革軍退；北軍遂進至一道橋，與革軍開戰，礮隊發彈多命中，革軍又退；北軍進占江岸及戴家山一帶，以礮轟車站，時泊於陽邏之兵艦，亦開礮助攻，革軍發礮多不中，遂沿鐵路線退至大智門。午後七時又開戰，經三小時，北軍用野礮向大智門開發，於鐵路線上排列機關礮，革軍分爲兩路：一出跑馬場，一出日本租界後，兩軍大戰，頗爲劇烈。有頃，革軍不支，北軍遂奪得大智門。是戰也，兩軍死者各近千人。是日有旨，湖廣總督袁世凱授爲欽差大臣，海陸各軍，均歸節制。又令陸軍大臣蔭昌回京，將第一軍交馮國璋統率，令段祺瑞總統第二軍。初七日，北軍由大智門進攻，革軍據歆生街之附近爲根據地，交戰數次，各相持不下。初八日，革軍李克果率湖南精兵三千，金長率武昌精兵二千，向大智門進攻，北軍大敗；適有援軍至，遂併力擊退革軍。是

時北軍已有鐵路全線，得以迅速進軍，礮馬隊本駐灞口以北者，至是進駐劉家廟大智門一帶，馮國璋亦已到漢，當晚北軍又進攻，用大礮先毀民房，於是跑馬場附近一帶，至市街前部，盡爲北軍所得，惟市街內則仍爲革軍所據。初九日，北軍縱火焚燒華界民房。初十日，北軍之步兵分布於鐵路兩面，礮隊列陣於玉帶門，大智門車站附近，與華界革軍交戰，十分猛烈，北軍共死三千五百餘人。十一日，北軍仍在漢口華界縱火，被焚民房，不下千數百間，居民紛紛逃避，革軍盡退入武昌漢陽。是日有旨，以袁世凱爲內閣總理大臣，督師如故。十二日，漢口火未息，華界盡成焦土。十三日，革軍黃興受總司令官之印。十四日，漢口兩軍又交戰，薩鎮冰之軍艦亦在武昌下游開礮助攻，革軍發青山上之礮數下，北軍不支，退出火車站。是日清廷有旨，令袁世凱所統各軍停止進攻。十五日又交戰，革軍由鳳凰山開礮攻大智門，北兵死者甚衆，降者四百餘人，北軍復設大礮於跑馬場，爲攻漢陽之用。十六日，袁世凱奉到清廷停止進攻之諭，囑劉承恩致書黎元洪議和，書中述清廷之德意，分

爲四大綱一下罪己之詔；二、實行立憲；三、赦開黨禁；四、皇族不問國政。末則以富貴利達歆動元洪。元洪拒之。十八日，兩軍又交戰，漢陽武昌漢口三處，均用大礮彼此轟擊，北軍漸退，舍大智門車站而去。十九日，北軍千餘人，攜大礮數尊，由馬路至橋口，革軍自龜山發礮數次，擊散其步隊，北軍亦燃礮回擊。其後武昌漢陽兩處，時以礮擊漢口之北軍，遂將北軍所據之礮臺，悉數毀壞。二十日，北軍圍攻漢陽，礮聲大作，革軍礮臺四面還擊，傍晚始止；是日北軍又在招商局碼頭躉船上，專擊乘船渡江之人，斃者不少，各國領事出而阻止之。此匝月以來，清政府與革命軍交戰之大略也。

至若兵事以外，清政府之對付革命之變，亦可得而言焉。八月二十九日曾有旨，『着廕昌袁世凱岑春煊端方。仰體朝廷德意，沿途宣布，妥爲撫輯，被脅兵民，准予自新，不咎既往，搜獲名冊，立即銷毀，毋得株連。』九月初一日懿旨：『將孝欽皇太后遺帑內撥銀二十萬兩，交袁世凱賑濟湖北災民。』初五日懿旨：『賞內帑銀三

萬兩，充慈善救濟會拯濟之資。」十四日有旨：「各省統兵大員，務當申明紀律，嚴禁騷擾。」十九日有旨：「准呂海寰奏，推廣慈善救濟會，按照紅十字會章程辦理。」清政府又以爲禍亂之源，由於郵傳大臣之違法斂怨也，故初五日有旨：「盛宣懷着革職永不敘用；」知鄂變之起，亦影響於川事之操切也，故同日有旨：「分別懲處四川地方官趙爾豐、田徵葵、周善培等；而被拘之蒲殿俊、羅綸、鄧孝可等，則卽行釋放；」知四海怨望，起於慶內閣之不負責任也，故十一日有旨：「准內閣諸臣之辭職；」知事變已急，非有切實之讓步，未易挽救也，故初九日，特下罪己之詔，又有「允將憲法交資政院協贊，允內閣不任懿親，允速開黨禁」等諭旨；十三日，又允將憲法重大信條十九條宣誓太廟；且十二日諭旨，於第二十鎮統制張紹曾等之要求，則嘉其愛國之誠；十五日諭旨，於主張革命之黨人，亦准其按照法律，改組政黨；舉從前所深閉固拒不少假借之事，一旦取懷而予，曾不之靳。觀於此，亦可見清政府之不無戒心矣。

第二章 革命成功時代

一 各省之狀況

各省響應之較晚者，爲貴州四川新疆三省。貴州起事，在九月十四日，以地勢僻遠，故得耗較遲。其起事也，由軍界發起，聯同政學兩界，在諮議局議決，宣布獨立。十四日黎明，新軍防營陸軍學生同時入城，分守藩庫火藥局等處，改諮議局爲軍政府，舉新軍教練官楊柏舟爲都督，新軍隊官趙德全爲副都督，並由外屬寓省同鄉各舉代表，回籍籌辦一切，以期互相聯絡。

四川響應，以重慶爲最早。十月初一日，重慶城內，有中華民國軍政府蜀軍總司令處告示，略謂：『本軍起義，以興漢排滿保教安民爲宗旨，定期明日入城，人民當照常安業』等語；並派代表與各團體紳商接洽，約次日四時入城。紳商恐有衝突，乃向重慶府及巴縣說以利害，請速定計，府縣皆允贊同。至初二日，全城懸掛白旗，

四時，民軍首領十餘人入城，道府縣將關防印信交出，公舉張培爵爲都督，夏之時爲副都督。初三日店舖照常開市。至初五日，瀘州又復響應。先一日，有鄂軍政府幹事隊二人，會同後路巡防統領，入城謁見川南道；是晚，川南道即請各界紳董，入署密商。次日復議於勸學所，至十二時，遂宣布獨立。公推川南道劉朝望爲都督。其時省城成都府紳商，亦提議獨立。至初六日，乃與總督趙爾豐商定川省獨立事件，川人要求十一條，趙要求川人十九條。其中要件，川人所要求者爲行政事宜歸川人自辦，軍隊由趙酌併，務求統一，趙仍辦理邊務等事；趙所要求者爲不排滿，不仇官，不排外，邊防各費，由川擔任，藏款照舊協濟等事；彼此公同認可，即於初七宣布獨立，舉蒲殿俊爲都督，朱慶瀾爲副都督。

新疆之伊犁將軍志銳，未抵伊犁之前，與甘督長庚等謀擁立清已廢大阿哥，偏安甘新，抵任後，即暗調滿蒙兵隊，遣散陸軍，事爲民黨同志楊纘緒馮特民偵悉，乃聯合回民，攻擊軍庫，捕戮志銳，公舉廣福爲新伊都督，各部落先後歸附。

其他未響應之各省，亦多有表同情於革軍者，以無兵力，及兵力薄弱未能起事；或起事而爲清軍兵力所制，旋即失敗。茲就其可以紀述者列如下：

河南嵩縣王天縱，九月間由南陽回嵩，募勁旅七千人，於十月十三日圍洛陽城，并攻偃師縣，擊洛陽大佛寺，與清軍戰，大勝，復回嵩縣，襲孟津，旋以軍火不足，且得秦軍王司令文告，停戰期內，戒勿妄動，乃拔隊回駐獨立山，隻身赴陝，與秦軍接洽機宜；復回汴，調嵩洛汝州民軍一萬餘人，分駐盧汝間，以扼要隘，適北兵違約進攻秦軍，天縱率隊襲其後，北兵敗潰，靈寶縣遂爲秦軍所得。

奉天民軍之首先發難者，爲駐紮莊河之顧人宜兄弟，並有安東之鮑軍與之聯絡，名爲滿洲征清第一軍，公舉前奉天陸軍協統藍天蔚爲關東大都督，規畫機宜，而遼陽州城西劉二堡，亦有民軍起事，推徐景清爲首領，惟以軍火未見充足，故不能銳意進取。

直隸第二十鎮四十協駐紮灤州之軍隊，於十一月初十日，通電北京清內閣，願

直諮議局，民軍伍代表，力主共和政體，願參入民軍之列。清內閣得電後，派通永鎮王懷慶馳往勸慰暫緩舉動，以俟國民會議；王抵灤復，該軍即擁以爲北軍大都督，擬十四日率師北上，並用王之名義，致電天津領事團，擔任保護外人生命財產；王佯以籌餉爲名，逃至開平，發電報告直督，轉電袁世凱，派姜桂題軍前往，姜軍乃乘其不備，將各軍官掩獲。王懷慶復電袁世凱，添派第三鎮兵，暨直奉巡防營圍繫灤州；於是灤軍迫於兵力，相率解散。

此外如王熙普之在天津運動起事，奉天急進會副會長柳大年在寧遠州圖謀舉義，河南省城張鍾端之集會，均以勢力未厚，中途失敗；且以身殉。然其傾向共和贊同革命，則與響應各省同茲目的，其事其人，亦有足多者，不能以成敗論也。

各省中之最足阻戰事之進行而爲革軍之障礙者，莫如山東。取銷獨立一事，初山東之宣布獨立也，孫寶琦本非絕對贊成，而第五鎮新軍亦多模稜兩可；獨立後，孫仍電奏清廷，有一俟大局定後，中興政府完全無缺，即行取銷；且有臣受國厚恩，

及臣罪當萬死等語。其告示亦仍用宣統某年月日，一切佈置與清廷關係尙未斷絕。旋聞袁世凱到京組織內閣，第五鎮將校多爲袁之舊部，乃起而反抗。山東京官亦貽書詰責寶琦懼，乃取銷獨立，奏請懲處。於是革軍經營北省之勢力爲之一挫，而清軍遂得無所顧忌，致其兵力於晉豫之間。

若夫獨立後復小有挫失者，爲山西陝西安徽三省。山西自九月初八響應後，清廷以吳祿貞爲巡撫，山西都督閻錫山欲與祿貞謀，聯軍北上，適祿貞被刺，不果行。清廷乃命曹錕率兵一鎮攻山西。十月初旬，兩軍疊次開戰。初九日，清軍攻石家莊。十五日，佔大同府。十九日，山西軍政府得停戰議和之電，防禦稍疏。二十日，清軍突至乏驢嶺，復以他隊繞襲民軍之後；二十二日攻據娘子關，娘子關爲省城門戶，此關旣失，太原無可扼守。閻都督乃率師南行，擬與秦軍合；於是山西省城遂仍爲清軍所有矣。同時陝西潼關亦被清軍攻據，而倪嗣冲復率軍隊攻襲安徽之颍州。

二 海軍之歸附

民軍佔領上海後，有停泊上海高昌廟楊樹浦二處之兵艦，名楚有、建安，策電飛鯨者四艘，運船名登瀛洲者一艘，魚雷艇名辰字、宿字、列字、湖鵬者四艘，均懸挂白旗，歸附民軍。

越數日，海軍艦隊之在長江上游者，因米煤缺乏，駛至鎮江，又恐象山焦山等處砲臺轟擊，不敢前進，停泊江心。鎮軍都督府特派人登輪，勸其歸附，該艦隊遂一律懸掛白旗，計共有兵艦鏡清、保民、楚觀、聯鯨、江元、江亨、建弢、通濟、楚同、楚泰、飛鷹、楚謙十二艘，暨魚雷艇名張字者一艘。鎮軍政府當將兵弁水手，一律給發雙餉，暫駐長江，聽候調遣。

同時復有海籌、海琛、海容三艦及湖鷹魚雷艇，在九江歸附，蓋海軍各艦，多表同情於民軍者，故武漢戰事，初未開礮助清軍轟擊，即不得已而發礮，亦不願命中。二十一日，三艦奉命由漢口下駛，行至半途，乃公同商議，決計歸附。二十三日，抵九江，即懸白旗，表同情之意，並拋錨於租界，以釋羣疑，旋由九江軍政府派員至艦接洽。

一切并商請移泊華界以助軍威此外復有南琛鈞和二艦由長江抵滬投入民軍該兩艦戎裝均甚完備旋仍開赴長江與各艦會合。餘如楚豫、建威、江利、江貞、湖鷄、湖隼、虎威、江平、舞鳳、建武、甘泉各艦亦先後歸附。嗣由鄂軍政府委任吳應科爲海軍總司令官，黃鍾瑛爲海軍司令部長，以一事權而專責成。

三 南京及武漢之戰事

南京者，據長江天塹之險要，扼鄂皖與蘇滬之交通，民軍所必爭，而亦清軍所必守者也。清廷於無事之日常駐重兵於其間，且有駐防旗兵，協同鎮守。自武漢發難而後，總督張人駿卽陸續調集江防營，分紮要隘；又以各省新軍多附革命，遂疑及駐寧第九鎮之新軍。既拒該軍統制徐紹楨給發子彈之請，且檄令移駐秣陵關，而以扼守南京之權授之江防統領張勳。新軍本多贊同革命者，既遭嫌疑，人心愈憤，遂於十八九日，進攻雨花臺，因子彈缺乏，未能獲勝，退駐鎮江，適蘇浙滬所派會攻

南京之兵先後至鎮，徐軍子彈亦由上海置配完備，遂公舉徐爲聯軍總司令。二十
六日由鎮江出發，進攻南京，皖粵桂三省亦派兵來會。初四日，聯軍與張軍戰於孝
陵衛，占烏龍山礮臺；初五日，佔幕府山礮臺；初六日，復與張軍戰，張軍大敗，遂進逼
神策門，攻襲獅子山；初七日，佔孝陵衛獅子山，分三路進攻；初十夜，佔領天保城，十
二日佔領雨花臺，攻入南門太平門，南京全城遂爲民軍所領。其隔江之浦口爲張
勳大本營駐紮地，民軍亦乘勝攻佔之，分兵屯駐，以禦南下之清軍。

武漢自九月二十後，仍繼續攻戰。二十一日，民軍以清軍在招商局躉船上槍擊
行人，特開礮向躉船轟擊，清軍死傷甚衆；是夜，民軍游擊攻及漢陽黑山與龜山之
礮臺，均開礮轟擊清軍。二十二日晚，漢口清軍礮擊武昌。二十三日，又向漢陽攻擊；
民軍還礮擊之，燬其一礮。武昌鳳凰山與漢口龍王廟北軍之礮臺，亦互相發礮，兩
軍俱未大傷。二十四日，民軍礮擊清軍，復偵知北軍內鬨，乘勢分三路渡江攻擊，清
軍大敗，退紮歛生路。二十六日又戰，民軍佔橋口。二十七日，民軍分兩隊攻漢口，一

隊由黑山潛渡漢水一隊由孝感包圍清軍不支退駐大智門其大營之在劉家廟者出大隊抵抗，民軍仍回漢陽。是役也，兩軍死傷甚衆。二十八日，民軍分三路進攻，互相攻戰，無大損傷。二十九日午後，兩軍交戰頗劇，海軍軍艦，開礮助攻，清軍大創。三十日，兩軍開礮互相搖擊。十月初一日，清軍礮攻漢陽兵工廠，爲民軍還礮擊退。初二日，民軍佔梅子山。初三日，清軍持白旗僞作民軍裝束，佔雨淋美娘山，民軍迎擊，各死千餘人。初四日，清軍一鎮盡赴雨淋山，將以全力爭漢陽，雨淋山遂爲清軍所佔，旋又爲民軍奪回。初五日，兩軍接戰甚烈。初六日，清軍佔黑山龜山四平山梅山，民軍退守武昌。初七日，清軍復佔漢陽府；是役也，清軍潛通民軍臺官張某使爲內應，故龜山黑山之礮皆不發，而地雷火線亦被斷；又以在漢陽之湘鄂兩軍微有意見，遂至不守。蓋自起義以來，未有如此次之挫失者。嗣後武漢略有小戰；至十三日，則停戰之約成，兩軍遂各據佔領之地，而不復交綏矣。

四 和議之進行

袁世凱未到京之先，曾派蔡廷幹、劉承恩至鄂，與黎元洪議和。黎以所開條件仍主張君主立憲，拒不納。十月中旬，駐漢英領事出爲介紹，日本德美俄法各領事亦極意贊成；遂邀集兩軍代表，會議於英領署，議定雙方停戰，討論和局。於是清政府乃派唐紹儀爲內閣總理代表，其參贊隨員爲楊士琦等二十餘人；民軍亦公舉伍廷芳爲民國代表，並舉溫宗堯、王寵惠、汪兆銘、鈕永建爲之參贊。

十月二十八日，兩代表會議於上海英租界之市政廳，與於會場者，除代表所帶參贊外，復有英、日、德、美、俄、法各國領事，及發起調停之西商李德立等數人，惟於會議事件，絕不干涉。至十一月初一日，復爲第二次會議。兩次所議，伍代表始終堅執改設共和政體，要求清帝退位，並聲言如清廷不承認共和，卽無可開議。唐代表知難磋商，卽據以電達內閣，內閣以退位問題，關係重大，乃開內閣會議。一面據情奏聞，一面全體辭職。清太后卽於初九先後召集親貴暨內閣大臣，商議辦法，決定頒召集臨時國會議決政體之旨。唐代表既奉此旨，復與伍代表於初十一、十二、十三

日繼續開會將召集國會辦法議定四條（一）國民會議由各處代表組織每一省爲一處，內外蒙古爲一處，前後藏爲一處；（二）每處各派代表三人，每人一票，若有某處到會代表不及三人者，仍有投三票之權；（三）開會之日，如各處到會之數有四分之三，即可開議；（四）各處代表，江蘇安徽江西湖北湖南山西陝西浙江福建廣東四川雲南貴州由中華民國臨時政府發電召集；直隸山東河南東三省甘肅新疆，由清政府發電召集，並由民國政府電知該省諮議局；內外蒙古西藏，由兩政府分電召集。以上四條，已簽定矣，惟餘會議地點及日期未經議定，詎十四日（陽歷正月初二日）得袁來電，謂唐代表權限所在，祇以切實討論爲範圍，其所議各條，未與本大臣商明，遽行簽定，本大臣以其中有必須聲明及礙難實行各節，電請唐代表轉致，嗣據唐代表一再辭職，現經允准，自後應商各事，由本大臣與貴代表直接電商，冀可和平解決云云。於是議和之局，爲之一變。

伍代表既得此電，卽覆以唐使來滬，攜有全權代表文憑，五次會議所訂各條，一

經簽字，卽生遵守之效力。來電所云，不能承認；又以應商各事非電報所能盡悉，電請袁來滬面商。嗣是伍袁來往電文，均於代表權限及國會選舉方法，與夫地點日期，反覆辯難，並以商議需時，復將停戰期展，續限十四日。

此停戰期中，適清帝有退位之說，遂由伍代表以清帝退位後優待條件及優待滿蒙回藏人條件，正式通告內閣。惟因清廷有少數親貴把持反抗，而禁衛軍亦反對甚力，清內閣遂不能作正式之答商。

至陽歷二月五日，始得袁氏電告，謂現已有權討論此事，適清軍統將段祺瑞，聯合統兵大員四十二人。先日電請清廷早佈共和，以定大局；於是障礙悉去。優待條款，既得正式磋商；且復易於就範，至十二日而清帝退位之詔下矣。和議告成，民國統一，蓋自開議以來，以至退位之日，其中事機百變，枝節橫生，補救調和，頗費心力；然經一次挫折，卽多一次進步，免生民於塗炭，納五族於共和，謂非和議所收之良果歟？

五 邊境之被動

革命事起，全國既聞風景附矣；而邊境之因革命而被動者，亦有足記。

蒙古庫倫活佛者，蒙人所奉之教主也。與清庫倫辦事大臣三多夙多惡感，聞武昌起事，蒙人遂勃勃欲動。十月十一日，活佛率蒙兵至辦事大臣衙門，要求兵餉。三多未允，活佛遂宣言如無兵餉，應即出境。蒙人愈聚愈衆，聲勢洶洶，三多乃倉皇出奔，避匿俄領事署。而活佛遂即宣告獨立，聲言無論漢人滿人，均應立出蒙境。三多旋由庫倫起程，取道恰克圖，由西比利亞鐵路回京，而庫倫遂脫離清廷之羈絆矣。

清廷派駐西藏之軍隊，因川路事起，協餉無着，九月二十三日，駐紮拉薩之兵，首先變亂，擁至兵備處搶劫軍火。清駐藏參贊統領等策騎至營開導，衆兵以勢成騎虎，要求參贊統領眷屬來營居住，以爲信質。二十四日，叛兵復圍攻辦事大臣聯豫衙署，庫中軍械銀幣，悉數劫散，商店店鋪，亦多被搶劫者。二十五日，叛兵復以要求

聯豫勤王爲名，劫之至札什城大營；十月初一日復送之回署；嗣聞英國將派兵平亂，始陸續潰散，而波蜜江孜等處，亦相繼騷動。

他如騰越廳、干崖、土司刁安仁乘滇省響應革軍之際，率土勇數千人，取道永昌、府黃達鋪進攻大理府。而西南蒙人亦驅逐清廷將軍參贊，擬在烏里雅蘇臺、建國、黑龍江邊境之蒙人復暗引俄兵，侵佔臚濱府。凡此舉動，與革命事業關係不明，然皆以革軍起義，乘機變動，不得謂非受革命之影響者也，故併及之。

第三章 臨時政府成立時代

一 臨時政府之組織

武漢倡義，甫一月而湘、秦、晉、滇、贛、黔、浙、蘇、桂、皖、粵、閩各省，先後響應，宗旨雖同，機關互異。當事者以對內對外之不可不亟謀統一也，乃往返電商，籌議組織。先由鄂軍黎都督通電各省，請派員到鄂會議，浙軍湯都督、蘇軍程都督，亦致電滬軍陳都

督略謂：「美國革命，苦戰八年，卒收最後之成功者，賴十州會議總機關有統一進行維持秩序之力。其第一次第二次會議，均僅以襄助各州議會爲宗旨；至第三次會議，始能確定國會，長治久安。吾國急宜仿照美國第一次方法，於上海設立臨時會議機關，磋商對內對外善要方法。」其附提議大綱三條爲：一公認外交代表；一對於軍事進行之聯絡方法；一對於清皇室之處置。滬軍陳都督復以民軍倡義伊始，百凡待舉，無總機關以代表全國，外人疑慮，交涉爲難，因電致各省，公舉代表，赴滬開會，議建臨時政府。於是各省都督，皆先後選舉代表，剋日首途；其未光復各省，則由諮議局公舉。十月初旬，代表之行抵上海者，凡十省；其贛粵桂三省，則以鄂省先有請派之議，逕至武昌。此十三省均贊成組織臨時政府統馭全國之說，卽由十省代表在上海會議，先推武昌爲中央軍政府，並提議武昌既爲中央軍政府，各代表卽應前赴武昌，惟滬上仍留一通信機關，以便接洽機要。

當代代表團未全體到鄂之先，各省軍政府以代表到鄂，尙需日時，外交應付，不容

稍緩；乃先後電致鄂垣，凡民軍佔領各省，公推黎都督爲民國中央政府代表，而以鄂省爲暫時民國中央政府，凡與各國交涉，有關民國全體大局者，均由黎都督代表一切；同時有已到鄂省之各省代表，亦以是爲言，黎都督乃據情照會各領事，並聲明：『凡民軍舉義之先，所有滿清政府與各國締結之商約及所有借款之債權，均有效力；至武昌義旗既舉之後，無論滿清政府，向何國所借之債及所結之條約，則概不承認。』

同時黎都督復通電各省，略謂：『大局粗定，非組織臨時政府，內政外交，均無主體，極爲可危。前電請舉員會議，一時未能全到，擬變通辦法，先由各省電舉各部政務長，擇其得多數票者，聘請來鄂，以政府成立，照會各國領事，轉稟各國公使，請各本國承認，庶國基可以粗定。』並擬將臨時政府，暫分爲內務、外交、教育、財政、交通、軍政、司法七部。各省得電後，即各致電推舉，除外交一席亟須設立，由各省公推伍君廷芳爲總長，溫君宗堯爲次長，即行任事外；其餘各部，因代表議會將次成立，暫

不實行。

各省代表，既由滬議決，前赴武昌，即於十月初十日。在武昌會議，全體贊成於臨時政府未成立以前，推舉鄂軍都督爲中央軍政府大都督。惟時漢陽於初七日失守，鄂省軍務正在吃緊；而民軍旋於十二日攻取南京，情形不同，則臨時政府地點，不得不稍事變易。於是浙江湯都督，江蘇程都督，滬軍陳都督，復與駐滬各省代表籌商，將臨時政府改設南京，投票公舉黃君興爲假定大元帥，黎君元洪爲副元帥，庶援鄂及北伐兩軍號令，有所統一；并電在鄂代表齊赴南京，舉行正式典禮。是日適得在鄂代表電稱：『十省代表，公決臨時政府設於南京，定組織大綱二十一條，七日內各代表須會於南京，有十省以上代表到會，即行選舉大總統；復公決未舉總統以前，仍認鄂都督爲中央軍政府，並仍推伍溫二君爲外交總副長。』由是南京爲臨時政府地點，滬鄂兩處會議，固已同歸一致矣。惟大元帥一職，則黃興君一再謙讓，改由黎都督暫任。

中華民國臨時組織大綱列下

第一章 臨時大總統

第一條 臨時大總統由各省都督府代表選舉之，以得票滿投票總數三分之二以上者爲當選。

代表投票權每省以一票爲限。

第二條 臨時大總統有統治全國之權。

第三條 臨時大總統有統率海陸軍之權。

第四條 臨時大總統得參議院之同意，有宣戰媾和及締結條約之權。

第五條 臨時大總統得參議院之同意，有任用各部部长及派遣外交專使之權。

第六條 臨時大總統得參議院之同意，有設立臨時中央審判所之權。

第二章 參議院

第七條 參議院以各省都督府所派之參議員組織之。

第八條 參議員每省以三人爲限其派遣方法由各省都督府自定之

第九條 參議院會議時，每參議員有一表決權。

第十條 參議院之職權如左：

一 議決第四條及第六條事件；

二 承諾第五條事件；

三 議決臨時政府之預算；

四 檢查臨時政府之出納；

五 議決全國統一之稅法幣制及發行公債事件；

六 議決暫行法律；

七 議決臨時大總統交議事件；

八 答覆臨時大總統諮詢事件。

第十一條 參議院會議時，以到會參議員過半數之所決爲準；但關於第四條事

件，非有到會參議員三分之二之同意，不得決議。

第十二條 參議院議決事件，由議長具報，經臨時大總統蓋印發交行政各部執行之。

第十三條 臨時大總統對於參議院議決事件，如不以爲然，得於具報後十日內聲明理由，交令覆議。

參議院對於覆議事件，如有到會參議員三分之二以上之同意仍執前議時，應仍照前條辦理。

第十四條 參議院議長由參議員用記名投票法互選之，以得票滿投票總數之半者爲當選。

第十五條 參議院辦事規則，由參議院議訂之。

第十六條 參議院未成立以前，暫由各省都督府代表會代行其職權，但表決權每省以一票爲限。

第三章 行政各部

第十七條 行政各部如左：

一 外交部；

二 內務部；

三 財政部；

四 軍務部；

五 交通部。

第十八條 各部設部長一人，總理本部事務。

第十九條 各部所屬職員之編制及其權限，由部長規定，經臨時大總統批准施行。

第四章 附則

第二十條 臨時政府成立後六個月以內，由臨時大總統召集國民議會；其召集

方法，由參議院議決之。

第二十一條 臨時政府組織大綱施行期限，以中華民國憲法成立之日爲止。

各省代表既議定以南京爲臨時政府地點，遂先後齊集南京。初擬二十六選舉臨時大總統，嗣又詳細研究，以爲先已選舉大元帥，可以暫時執行臨時大總統職務，故暫從緩，遂由各代表逐日開會，商議臨時政府條件。至十一月初十日，乃開正式選舉總統大會，到會者凡十七省，代表四十五人，共投十七票，孫文君得十六票，遂當選。孫君提倡革命，奔走海外，凡二十年。自武昌起義以後，民軍首領，曾發電敦促回國，江蘇程都督復以組織政府，非孫莫屬爲言，當時各省均贊成此說，孫君於初七日抵滬，至是遂被舉爲中華民國第一期大總統。

二 南京政府之成立

孫文君既當選爲臨時大總統，南京各省代表團即發電敦促就任。孫總統遂於

陽歷一月一號即舊歷十一月十三日攜同顧問員由滬專車赴寧下午十時行就任禮宣讀誓詞詞曰『傾覆滿洲專制政府鞏固中華民國圖謀民生幸福取民之公意文實遵之以忠於國爲衆服務。至專制政府既倒國內無變亂民國卓立於世界爲列邦所公認斯時文當解臨時大總統之職謹以此誓於國民。』誓畢旋即發令改用陽歷以本日爲中華民國元年元月元日蓋先一日由各省代表團議決者至是乃奉總統命令頒行。

十七省代表復議決臨時政府應添設臨時副總統於初三日特開正式會投票選舉黎元洪君得十七票當選爲臨時副總統。孫總統既就任即着手組織內閣初三日正式宣布。

陸軍總長黃興；

次長蔣作賓；

海軍總長黃鍾瑛；

次長湯薌銘；

司法總長伍廷芳；

次長呂志伊；

財政總長陳錦濤；

次長王鴻猷；

外交總長王寵惠；

次長魏宸組；

內務總長程德全；

次長居正；

教育總長蔡元培；

次長景耀月；

實業總長張謇；

次長馬君武；

交通總長湯壽潛；

次長于右任。

部中職員，分薦任委任兩項，即由部長組織，先後報告成立。而議和全權代表，則仍委任伍廷芳溫宗堯接任。

政府成立，應設參議院以爲立法機關，照代表團所議臨時政府組織大綱，參議院應由各省都督府所派參議員組織，業經通電選派；惟以道路睽隔，未能剋日到寧；而會議事件，不容延擱，乃先由各省代表員暫行代理，除星期停議暨特別開議外，每日會議兩小時。其後各省所派參議員陸續抵寧，乃於正月二十八日正式成

立開會，選舉林森爲正會長，陳陶怡爲副會長，然仍有數省未到，計已到者爲廣東、湖北、湖南、浙江、江蘇、安徽、江西、山西、福建、廣西十省，共參議員三十人；未到而以代表員代理者，爲貴州、雲南、陝西、四川、奉天、直隸、河南七省，共代理員十二人。

當政府未成立之先，曾由湖南譚都督發起，以臨時中央政府所在地應設參謀本部，藉資統一，電請各省贊成，派員組織，各省均覆電照派。孫總統就任後，委任黃興爲總參謀，鈕永建爲副參謀，設參謀部於總統府內；以各省參謀員未能速到，遲至二月六日始正式成立。

孫總統以政府成立，所有一切法律命令，亟須編訂，而公布法律命令亦宜設立機關，因提議創設法制院，並發行臨時政府公報，旋由參議院將法制院職制議決施行，而公報亦同時發布；於是對內對外立法執行各機關漸臻完備矣。

至政治上之設施：軍政則頒布臨時軍律，限制各省招兵；內務則整頓全國警察，保護人民財產；財政則取締各省借款，發行全國公債；以及教育之頒行辦法，外交

之保護外人，凡此卓犖諸大端，已漸收整齊畫一之效。而作戰方略，則議定以鄂湘爲第一軍，由京漢鐵道前進；寧皖爲第二軍，向河南前進；淮揚爲第三軍，煙臺爲第四軍，向山東前進；秦皇島合關外之軍爲第五軍，山陝爲第六軍，向北京前進。聯各省之勁旅，聽指令於中央，整飭戒行，師行有日矣。適和議已將告成，遂不出發。

三 清帝退位及南北統一

南京政府雖已準備師干，聯同北伐，惟以尊崇人道，不願訴諸武力，塗炭生靈；故苟有可以調停之處，仍以和平解決爲目的。適滿清內閣總理袁君世凱亦同此旨，自受任內閣後，即遣員至武昌，與黎都督議和，事雖無成，然實爲南北統一之嚆矢。嗣後復以外人之介紹，約期停戰，委託唐紹儀爲代表，由北南下，與民軍代表伍君廷芳疊次開議，已議定開臨時國會，公決政體，清帝且有旨公布矣。旋因別有窒礙，致將唐紹儀之代表撤銷，而國會亦不能即時召集，於是南北統一之機，爲之一阻。

維時南京政府尙未成立也；迨成立後，伍代表復與袁總理往返電商，惟以格於情勢，且有少數宗黨橫梗其間，故僅能就召集國會方法與地點日期，互相磋商。然是時北京庫藏已將告竭，南北分治，民軍既不樂從；兵刃相交，餉項又復不給，稍明大勢者，固已知除和平解決之外，別無他途矣。斯時也，民軍既秣馬厲兵，預備北伐，而北師重將，清廷所恃爲捍衛者，亦知大勢所趨，非人力所能挽救，於是第一軍統制段祺瑞首先贊成共和，聯同各軍，電達內閣，奏請宣布共和政體。出使大臣陸徵祥等，及卸任總督岑春萱、袁樹勳，復先後以此旨奏陳。清廷既知臣民意旨之所在，各親貴亦自度力有不敵，乃不復如前之抗議，而統一之機，漸就成熟矣。

先是伍代表會以南北統一後，優待清室及滿蒙回藏人條件，正式通告內閣，因當時多所扞格，不及籌商。至是乃由清廷委任袁內閣直接磋商，即與伍代表往返電商，計分三項：甲關於清帝辭位後優待條件；乙關於清皇族待遇條件；丙關於滿蒙回藏各屬待遇條件。二月十二日，清內閣覆電，一一承認，清帝辭位之詔，亦同時

宣布，以北方治權，公諸全國，由是而統一之局，乃完全成立矣。

清帝於二月十二日所下詔書凡三道，其一宣布將統治權公諸全國者，謂：

「前因民軍起事，各省響應，九夏沸騰，生靈塗炭，特命袁世凱遣員與民軍代表討論大局，議開國會，公決政體。兩月以來，尙無確當辦法，南北睽隔，彼此相持，商輟於途，士露於野，徒以國體一日不決，故民生一日不安。今全國人民心理，多傾向共和，南中各省，既倡議於前，北方諸將，亦主張於後，人心所嚮，天命可知，予亦何忍因一姓之尊榮，拂兆民之好惡；是用外觀大勢，內審輿情，特率皇帝將統治權公諸全國，定爲共和立憲國體，近慰海內厭亂望治之心，遠協古聖天下爲公之義。袁世凱前經資政院選舉爲總理大臣，當茲新舊代謝之際，宜有南北統一之方，卽由袁世凱以全權組織臨時共和政府，與民軍協商統一辦法，總期人民安堵，海宇乂安，仍合滿漢蒙回藏五族完全領土，爲一大中華民國，予與皇帝得以退處少閒，優游歲月，長受國民之優禮，親見邛治之告成，豈不懿歟！」

其二爲宣布優待皇室條件優待皇族條件待遇滿蒙回藏條件者，謂：

『前以大局阡危，兆民困苦，特飭內閣與民軍商酌優待皇室各條件，以期和平解決。茲據覆奏，民軍所開優禮條件，於宗廟陵寢，永遠奉祀，先皇陵制，如舊妥修各節，均已一律擔承，皇帝但卸政權，不廢尊號，並議定優待皇室八條，待遇皇族四條，待遇滿蒙回藏七條。覽奏尙屬周致，特行宣示皇族暨滿蒙回藏人等，此後務當化除畛域，共保治安，重觀世界之昇平，胥享共和之幸福，予實有厚望焉！』

(甲)關於大清皇帝辭位之後優待之條件。

今因大清皇帝宣布贊成共和國體，中華民國於大清皇帝辭退之後，優待條件如左：

第一款 大清皇帝辭位之後，尊號仍存不廢，中華民國以待各外國君主之禮相待。

第二款 大清皇帝辭位之後，歲用四百萬兩，俟改鑄新幣後改爲四百萬元，

此款由中華民國撥用

第三款 大清皇帝辭位之後，暫居宮禁，日後移居頤和園，侍衛人等，照常留用。

第四款 大清皇帝辭位之後，其宗廟陵寢，永遠奉祀，由中華民國酌設衛兵，妥慎保護。

第五款 德宗崇陵未完工程，如制妥修，其奉安典禮，仍如舊制，所有實用經費，均由中華民國支出。

第六款 以前宮內所用各項執事人員，可照常留用，惟以後不得再招闖人。

第七款 大清皇帝辭位之後，其原有之私產，由中華民國特別保護，

第八款 原有之禁衛軍歸中華民國陸軍部編制，額數俸餉，仍如其舊。

(乙) 關於清皇族待遇之條件。

一、清王公世爵，概仍其舊。

- 二、清皇族對於中華民國國家之公權及私權與國民同等。
- 三、清皇族私產，一體保護。
- 四、清皇族免當兵之義務。

(丙)關於滿蒙回藏各屬待遇之條件。

- 今因滿蒙回藏各民屬贊同共和，中華民國所有待遇者如左：
- 一、與漢人平等。
 - 二、保護其原有之私產。
 - 三、王公世爵，概仍其舊。
 - 四、王公中有生計過艱者，設法代籌生計。
 - 五、先籌八旗生計，於未籌定之前，八旗兵弁俸餉，仍舊支放。
 - 六、從前營業居住等限制，一律蠲除，各州縣聽其自由入籍。
 - 七、滿蒙回藏原有之宗教，聽其自由信仰。

以上條件，列於正式公文，由兩方代表，照會各國駐北京公使轉達各該政府。」
其三爲退位後維持京內外秩序及告誡各省疆吏者，謂：

『古之君天下者，重在保全民命，不忍以養人者害人；現將新定國體，無非欲先弭大亂，期保父安，若拂逆多數之民心，重啓無窮之戰禍，則大局決裂，殘殺相尋，勢必演成種族之慘痛，將九廟震驚，兆民荼毒，後禍何忍復言。兩害相形，惟取其輕者，正朝廷審時觀變，痾瘵吾民之苦衷，凡爾京外臣民，務當善體此意，爲全局熟權利害，勿得挾虛驕之意氣，逞偏激之空言，致國與民兩受其禍。著民政部步軍統領姜桂題馮國璋等嚴密防範，剴切開導，俾皆曉然於朝廷應天順人大公無私之意。至國家設官分職，以爲民極，內列閣府部院，外建督撫司道，所以康保羣黎，非爲一人一家而設，爾京外大小各官，均宜慨念時艱，慎供職守，應卽責成各長官，敦切勸誡，毋曠厥官，用副朝廷夙昔愛撫庶民之至意。』

雖然，此猶名義上之統一耳；南北統治之機關，猶待組織也。孫總統迺於清帝辭

位之次日，至參議院提出辭職書，並推薦袁世凱君於參議院；內務部亦電告南北各省，力圖進步，消除南北之見。同時袁君復以組織臨時政府名義，致電北方各省，勉令保全大局，維持秩序，以期南北兩方，消化眚哇，逐漸聯合。十五日，南京參議院以全院之同意，公舉袁世凱君爲統一政府臨時大總統，並派專使蔡元培等北上歡迎，以着手統一政府之組織。

四 統一政府之成立

南北既已聯合，總統亦經選舉，而統一政府所以不能剋期成立者，則以政府在南，總統在北，將強政府以就總統乎？則政府爲機關，總統爲個人，無強機關以就個人之理；將強總統以就政府乎？在理法上固爲不易之條件，然當日者，北方秩序，正賴維持，東北人心，猶難一致，部署完密，尙費日時，總統南行，難期剋日；有此二故，遂致遷延。於是論者紛紛，或謂建都宜仍在北京，或謂臨時政府，始在北京設立，然此

皆并建都及臨時政府地點爲一談，與總統就任問題，初無關涉也。

南京政府之派蔡專使等赴北京也，實爲歡迎袁總統蒞寧就職，專使抵京後，即謁袁總統，陳明此旨，袁總統已有南行意矣，正與各軍統制及民政首領商擬留守之人，至二月二十九日，駐京第三鎮輜礮兩營兵隊忽焉譁變，且蔓延及於津保，於是北方大局，更不得不賴袁總統之坐鎮，而南行之舉，愈將延期。夫統一政府之亟須成立也，既如彼，袁總統之不能即日蒞寧也，又如此，遂不得不別籌變通之法，由袁總統蔡專使分別將北京情形及變通理由，電致南京政府，即經提交參議院議決辦法六條，電復袁總統：（一）由參議院電知袁大總統，允其在北京受職；（二）袁大總統接電後，即電參議院宣誓；（三）參議院接到宣示之後，即覆電認爲受職，併通告全國；（四）袁總統既受職後，即將擬派國務總理及各國務員姓名電知參議院，求其同意；（五）國務總理及各國務員任定後，即在南京接收臨時政府交代事宜；（六）孫總統於交代之日，始行解職。袁總統得電後，遂電達誓詞，經參議院承認。

於三月初十日在北京行正式受任禮。誓詞曰：「民國建設造端，百凡待治，世凱深願竭其能力，發揚共和之精神，滌蕩專制之瑕穢，謹守憲法，依國民之願望，斬達國家於安全強固之域，俾五大民族，同臻樂利，凡茲志願，率履勿渝；俟召集國會，選定第一期大總統，世凱即行解職。謹掬誠悃，誓告同胞。」

當清帝退位之後，孫總統辭職之初，黎副總統以臨時政府應從新組織，向參議院電辭副總統之職，參議院旋於二月二十日開會選舉，全院一致，公舉黎元洪續任副總統。

袁總統在北京受職後，即先從事於國務員之組織，添設國務總理，得參議院同意，以唐紹儀充任。並分實業爲農林工商二部，而內務復分設次長兩員，以一員管理蒙盟回藏，北省總督巡撫，皆改稱都督，以期南北一致，並派唐紹儀至南京，會商參議院，簡任國務員，至三月三十日，國務總長發表，外交總長爲陸徵祥，內務總長爲趙秉鈞，理財總長爲熊希齡，陸軍總長爲段祺瑞，海軍總長爲劉冠雄，教育總長

爲蔡元培，司法總長爲王寵惠，農林總長爲宋教仁，工商總長爲陳其美，惟交通總長以一時未得其人，暫由唐紹儀兼理，旋即以施肇基任之。其各部次長，嗣亦先後委任，並以南京軍隊衆多，任黃興爲南京留守，總轄南洋各軍，以資鎮攝。

國務員既經任命，孫總統即於四月初一日頒解職令，並至參議院行正式解任禮，黎副總統亦於初六日解大元帥之職，併歸袁總統兼任。參議院復於四月二日，議決臨時政府遷往北京，旋又議決參議院移至北京開議，其中中華民國臨時約法，則先於三月十一日由孫總統公布，參議院議員人數，亦擬照約法規定，重新組織。由是立法行政各機關，較南京政府更形完備，唐總理及被任國務員之在南省者，亦相偕北上，從事設施，謀共和之幸福，躋中國於富強，豈不休歟！

附錄

中華民國臨時約法

元年三月十一日公布

第一章 總綱

第一條 中華民國由中華人民組織之。

第二條 中華民國之主權，屬於國民全體。

第三條 中華民國領土，爲二十二行省，內外蒙古，西藏，青海。

第四條 中華民國以參議院，臨時大總統，國務員，法院行使其統治權。

第二章 人民

第五條 中華民國人民一律平等，無種族，階級，宗教之區別。

第六條 人民得享有左列各項之自由權：

- 一 人民之身體，非依法律不得逮捕，拘禁，審問，處罰；
 - 二 人民之家宅，非依法律不得侵入或搜索；
 - 三 人民有保有財產及營業之自由；
 - 四 人民有言論，著作，刊行及集會，結社之自由；
 - 五 人民有書信秘密之自由；
 - 六 人民有居住遷徙之自由；
 - 七 人民有信教之自由。
- 第七條 人民有請願，於議會之權。
- 第八條 人民有陳訴於行政官署之權。
- 第九條 人民有訴訟於法院，受其審判之權。
- 第十條 人民對於官吏違法損害權利之行爲，有陳訴於平政院之權。
- 第十一條 人民有應任官考試之權。

第十二條 人民有選舉及被選舉之權。

第十三條 人民依法律有納稅之義務。

第十四條 人民依法律有服兵之義務。

第十五條 本章所載人民之權利，有認為增進公益，維持治安，或非常緊急必要時，得依法律限制之。

第三章 參議院

第十六條 中華民國之立法權，以參議院行之。

第十七條 參議院以第十八條所定各地方所選派之參議院組織之。

第十八條 參議員每行省，內蒙古，外蒙古，西藏各選派五人，青海選派一人；其選

派方法，由各地方自定之。參議院會議時，每參議員有一表決權。

第十九條 參議院之職權如左：

一 議決一切法律案；

- 二 議決臨時政府之豫算決算；
- 三 議決全國之稅法，幣制及度量衡之準則；
- 四 議決公債之募集及國庫有負擔之契約；
- 五 承諾第三十四條三十五條四十條事件；
- 六 答覆臨時政府諮詢事件；
- 七 受理人民之請願；
- 八 得以關於法律及其他事件之意見建議於政府；
- 九 得提出質問書於國務員並要求其出席答復；
- 十 得咨請臨時政府查辦官吏納賄違法事件；
- 十一 參議院對於臨時大總統認為有謀叛行為時，得以總員五分四以上之出席，出席員四分三以上之可決彈劾之；
- 十二 參議院對於國務員認為失職或違法時，得以總員四分三以上之出席，

出席員三分二以上之可決彈劾之。

第二十條 參議院得自行集會，開會，閉會。

第二十一條 參議院之會議須公開之；但有國務員之要求，或出席參議員過半數之可決者，得秘密之。

第二十二條 參議院議決事件，咨由臨時大總統公布施行。

第二十三條 臨時大總統對於參議院議決事件有否認時，得於咨達後十日內聲明理由，咨院覆議；但參議院對於覆議事件，如有到會參議員三分二以上仍執前議時，仍照第二十二條辦理。

第二十四條 參議院議長由參議員用記名投票法互選之，以得票滿投票總數之半者為當選。

第二十五條 參議院參議員於院內之言論及表決，對於院外不負責任。

第二十六條 參議院議員除現行犯及關於內亂外患之犯罪外，會期中非得本

院許可，不得逮捕。

第二十七條 參議院法由參議院自定之。

第二十八條 參議院以國會成立之日解散，其職權由國會行之。

第四章 臨時大總統副總統

第二十九條 臨時大總統副總統由參議院選舉之，以總員四分之三以上之出席，

得票滿投票總數三分之二以上者為當選。

第三十條 臨時大總統代表臨時政府總攬政務，公布法律，

第三十一條 臨時大總統為執行法律或基於法律之委任得發布命令，並得使

發布之。

第三十二條 臨時大總統統帥全國海陸軍隊。

第三十三條 臨時大總統得制定官制，官規，但須提交參議院議決。

第三十四條 臨時大總統任免文武職員，但任命國務員及外交大使，公使，須得

參議院之同意。

第三十五條 臨時大總統經參議院之同意，得宣戰媾和及締結條約。

第三十六條 臨時大總統得依法律宣告戒嚴。

第三十七條 臨時大總統代表全國，接受外國之大使，公使。

第三十八條 臨時大總統得提出法律案於參議院。

第三十九條 臨時大總統得頒給勳章並其他榮典。

第四十條 臨時大總統得宣告大赦、特赦、減刑、復權；但大赦須經參議院之同意。

第四十一條 臨時大總統受參議院彈劾後，由最高法院全院審判官互選九人，

組織特別法庭審判之。

第四十二條 臨時副總統於臨時大總統因故去職或不能視事時，得代行其職權。

第五章 國務員

第四十三條 國務總理及各總長均稱爲國務員。

第四十四條 國務員輔佐臨時大總統負其責任。

第四十五條 國務員於臨時大總統提出法律案，公布法律及發布命令時，須副署之。

第四十六條 國務員及其委員得於參議院出席及發言。

第四十七條 國務員受參議院彈劾後，大總統應免其職，但得交參議院覆議一次。

第六章 法院

第四十八條 法院以臨時大總統及司法總長分別任命之法官組織之。

法院之編制及法官之資格，以法律定之。

第四十九條 法院依法律審判民事訴訟及刑事訴訟。

但關於行政訴訟及其他特別訴訟，別以法律定之。

第五十條 法院之審判須公開之；但有認爲妨害安寧秩序者，得秘密之。

第五十一條 法官獨立審判，不受上級官廳之干涉。

第五十二條 法官在任中不得減俸或轉職，非依法律受刑罰宣告或應免職之懲戒處分，不得解職。懲戒條規，以法律定之。

第七章 附則

第五十三條 本約法施行後，限十個月內由臨時大總統召集國會，其國會之組織及選舉法，由參議院定之。

第五十四條 中華民國之憲法，由國會制定，憲法未施行以前，本約法之效力與憲法等。

第五十五條 本約法由參議院議員三分二以上或臨時大總統之提議，經議員五分四以上之出席，出席員四分三之可決，得增修之。

第五十六條 本約法自公布之日施行，臨時政府組織大綱，於本約法施行之日

廢止。

中華民國國會組織法

元年八月初十日公布

第一條 民國議會，以左列兩院構成之：

參議院；

衆議院。

第二條 參議院以左列各議員組織之：

- 一 由各省省議會選出者 每省十名；
- 二 由蒙古選舉會選出者 二十七名；
- 三 由西藏選舉會選出者 十名；
- 四 由青海選舉會選出者 三名；
- 五 由中央學會選出者 八名；

六 由華僑選舉會選出者 六名。

第三條 衆議院以各地方人民所選舉之議員組織之。

第四條 各省選出衆議院議員之名額，依人口之多寡定之，每人口滿八十萬選出議員一名；但人口不滿八百萬之省，亦得選出議員十名。

人口總調查未畢以前，各省選出之名額如左：

直隸 四十六名；

奉天 十六名；

吉林 十名；

黑龍江 十名；

江蘇 四十名；

安徽 二十七名；

江西 三十五名；

浙江 三十八名；

福建 二十四名；

湖北 二十六名；

湖南 二十七名；

山東 三十三名；

河南 三十二名；

山西 二十八名；

陝西 二十一；

甘肅 十四名；

新疆 十名；

四川 三十五名；

廣東 三十名；

廣西 十九名；

雲南 二十二名；

貴州 十三名。

第五條 蒙古西藏青海選出衆議院議員之名額如左：

蒙古 二十七名；

西藏 十名；

青海 三名。

第六條 參議院議員任期六年，每二年改選三分之一。

第七條 衆議院議員任期三年。

第八條 兩院議長，副議長各由本院議員互選之。

第九條 無論何人，不得同時爲兩院議員。

第十條 民國議會之開會及閉會，兩院同時行之。

第十一條 民國議會之會期爲四個月，但依事情之必要得延長之。

第十二條 民國議會之議事，兩院各別行之。

同一議案，不得同時提出於兩院。

第十三條 民國議會之議定，以兩院之一致成之。

一院否決之議案，不得於同會期內再行提出。

第十四條 民國憲法未定以前，臨時約法所定參議院之職權，爲民國議會之職權；但左列事項，兩院各得專行之：

- 一 建議；
- 二 質問；
- 三 查辦官吏納賄，違法之請求；
- 四 政府諮詢之答覆；
- 五 人民請願之受理；

六 議員逮捕之許可；

七 院內法規之制定；

預算決算須先經衆議院之議決。

第十五條 兩院非各有總議員過半數之出席，不得開議。

第十六條 兩院之議事，以出席議員過半數之同意決之；可否同數，取決於議長。

第十七條 臨時約法第十九條第十一款，第十二款，及第二十三條，關於出席及

議決員數之規定，於兩院各準用之。

臨時約法第二十一條之規定亦同。

第十八條 臨時約法第二十五條，第二十六條，關於參議員之規定，於兩院議員

各準用之。

第十九條 兩院議員之歲費及其他公費，別以法律定之。

前項會合時以參議院議長爲議長，衆議院議長爲副議長，非兩院各有總議員三分之二以上之出席，不得開議；非出席議員四分之三以上之同意，不得議決。

第二十二條 本法自公布日施行。

大總統選舉法

二年十月五日公布

第一條 中華民國人民，完全享有公權，年滿四十歲以上，並住居國內滿十年以上者，得被選舉爲大總統。

第二條 大總統由國會議員組織總統選舉會選舉之。

前項選舉，以選舉人總數三分之二以上之列席，用無記名投票行之，得票滿投票人數數四分之三者爲當選；但兩次投票無人當選時，就第二次得票較多者二名決選之，以得票過投票人數之半者爲當選。

第三條 大總統任期五年，如再補選，得連任一次。

大總統任滿前三個月，國會議員須自行集會組織總統選舉會，行次任大總統之選舉。

第四條 大總統就職時，須爲左列之宣誓：

『余誓以至誠遵守憲法，執行大總統之職務，謹誓。』

第五條 大總統缺位時，由副總統繼任，至本任大總統任滿之日止。

大總統因故不能執行職務時，以副總統代理之。

副總統同時缺位時，由國務院攝行其職務，同時國會議員於三個月內自行集會組織總統選舉會，行次任大總統之選舉。

第六條 大總統應於任滿之日解職，如屆期次任大總統尙未選出，或選出後尙未就職，次任副總統亦不能代理時，由國務院攝行其職務。

第七條 副總統之選舉，依選舉大總統之規定，與大總統之選舉同時行之，但副總統缺位時，應補選之。

附則

大總統之職權，在憲法未制定以前，暫依臨時約法關於臨時大總統之規定。

The Sketch of 1912 Revolution

Commercial Press, Limited

All rights reserved

中華民國十二年十二月初版



（東方辛亥革命史一冊）

（每冊定價大洋壹角）

（外埠附加運費匯費）

編纂者 東方雜誌社

發行者 商務印書館

上海北河南路北首寶山路

印刷所 商務印書館

上海棋盤街中市

總發行所 商務印書館

北京天津保定奉天吉林龍江

濟南太原開封鄭州西安南京

杭州蘭溪安慶蕪湖南昌漢口

長沙常德衡州成都重慶瀘縣

福州廣州潮州香港梧州雲南

貴陽張家口新嘉坡

分售處

封底